



R Saya dah beritahu, lupakan perbezaan politik, yang penting saya pun nak mengajak dia

(Ahli Parlimen Segambut, Hannah Yeoh) bersama untuk fokuskan tenaga kita untuk sama-sama memerangi pandemik Covid-19 (koronavirus). Sama-sama kita menyekat penularan Covid-19 dalam kalangan rakyat. *Insyallah* jika kita bersama, kita akan menang, kita akan berjaya." - Menteri Kanan (Keselamatan) merangkap Naib Presiden UMNO, Datuk Seri Ismail Sabri Yaakob



R Saya kira semua pemimpin patut sambut baik dan rakyat mahukan pemimpin berhenti berpolitik dengan fokus

terhadap usaha menangani Covid-19, pulih ekonomi dan peluang kerja." - Menteri Besar Perak merangkap Timbalan Presiden Bersatu, Datuk Seri Ahmad Faizal Azumu



R Tidak perlu untuk politikkan setiap isu. Tidak perlu lagi menuding jari mencari salah siapa. Tidak perlu

lagi berebut kuasa. Isu-isu penting seperti kesejahteraan, keselamatan dan kesihatan rakyat perlu diletakkan di atas sekali. Begitu juga dengan keselamatan negara dan hala tuju ekonomi kita. 'Gencatan politik' yang diumumkan mencerminkan semangat itu. Ia bukan bermaksud mengalah atau kalah tetapi mengutamakan kepentingan rakyat dan negara." - Ahli Dewan Undangan Negeri Ususukan, Datuk Seri Salleh Said Keruak



R Kestabilan politik semasa negara amat diperlukan buat masa ini bagi memberikan ruang dan peluang seluas

mungkin. Ia bagi membolehkan kerajaan di bawah pimpinan Tan Sri Muhyiddin Yassin serta barisan Kabinetnya menumpukan soal menjaga kebajikan rakyat. UMNO Kedah yakin dan percaya keputusan tersebut adalah yang terbaik untuk meredakan keresahan, kesusahan dan penderitaan rakyat. Ia perlu segera ditangani serta diselesaikan dengan mengambil pendekatan drastik dan efektif." - Pengerusi UMNO Kedah, Datuk Seri Jamil Khir Baharom

Gencatan politik gambaran penyatuan parti untuk stabilkan semula tahap ekonomi Malaysia

Oleh MOHD AZLIM ZAINURY

SHAH ALAM

Pengumuman gencatan politik oleh Presiden UMNO, Datuk Seri Dr Ahmad Zahid Hamidi menunjukkan kesediaan parti untuk terus bekerjasama dengan kerajaan sekarang.

Pensyarah Kanan Fakulti Komunikasi Universiti Putra Malaysia, Dr Syed Agil Alsagoff berkata, penyatuan parti politik itu sangat bernilai untuk meningkatkan tahap ekonomi di negara ini.

Beliau yang juga pemerhati politik menegaskan, sekarang bukan waktu terbaik untuk berebut kuasa yang mampu memperjudikan masa depan rakyat demi agenda politik.

Tegasnya, pembentangan Belanjawan 2021 yang semakin hampir dibimbangi menjejaskan nilai pelaburan asing.

"Gencatan politik dapat melestarikan penyatuan kerjasama dan memberikan keyakinan kepada rakyat serta pelabur asing bahawa mereka mampu menjaga keamanan dan perpaduan nasional demi masa depan rakyat dan negara ini.

"Kita perlu mengambil contoh perkembangan di Thailand dan Indonesia



SYED AGIL

Bukti UMNO sedia bekerjasama

yang memperlihatkan kegagalan kerajaan meyakini rakyat terhadap strategi pemulihan pandemik koronavirus (Covid-19) yang mencetuskan huru-hara," katanya kepada *Sinar Harian* di sini semalam.

Kelmarin, Ahmad Zahid mengumumkan gencatan politik dan mengulangi sokongan kepada kerajaan Perikatan Nasional (PN) di sebalik hubungan tegang UMNO dan Parti Pribumi Bersatu Malaysia (Bersatu).

Syed Agil berkata, dalam isu itu, kesemua parti politik khususnya UMNO dan Bersatu harus mencari titik persefahaman membina jalinan pengukuhan budaya politik lebih matang.

Katanya, mungkin ada isu yang menjadi faktor parti politik bertelagah tetapi perlu diingatkan bahawa kemelut Covid-19 wajar diutamakan.

"Percaturan sekarang bukanlah ugutan dalam senario politik tetapi membina keserasian terutama menghadapi gelombang ketiga Covid-19," katanya.



Ahmad Zahid (kiri) mengumumkan gencatan politik dan mengulangi sokongan parti kepada kerajaan PN pimpinan Muhyiddin di sebalik hubungan tegang UMNO dan Bersatu.

Beliau berkata, rakyat mahukan pembelaan dari segi sosioekonomi serta bagaimana mereka akan meneruskan hidup.

Akuinya, pilihan raya umum juga tidak mungkin dilaksanakan berikutan penularan Covid-19 dan melumpuhkan pergerakan harian di beberapa negeri.

Katanya, gesaan penyatuan parti politik untuk menghadapi ancaman dunia juga disuarakan Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah sebelum ini.

"Seri Paduka menasihati rakyat khususnya ahli politik supaya bermuhasabah agar negara tidak diheret ke kancang politik tidak menentu," katanya.